

# 2024 BUDGET

Budget  
Speech



[national treasury](#)

Department:  
National Treasury  
REPUBLIC OF SOUTH AFRICA



**SISWATI**

**INKHULUMO  
YEMCOMBELELOTIMALI**

*Kubuka kuphakelwa ketinsita*

**Enoch Godongwana**

**Indvuna Yetetimali**

**21 Indlovana 2024**



ISBN: 978-0-621-51690-6

RP: RP03/2024

Kutfofa lwati lolwengetiwe:

Luphiko Lwetekuchumana  
Litiko Letetimali Lavelonkhe  
Private Bag X115  
Pretoria  
0001

ENingizimu Afrika

Lucingo: +27 12 315 5944

Ifeksi: +27 12 406 9055

Imiculu yemcombelelotimali iyatfolakala ku: [www.treasury.gov.za](http://www.treasury.gov.za)

Somlomo Lohloniphekile, Nosiviwe Mapisa-

Nqakula Umhlonishwa, Mengameli Cyril

Ramaphosa

Umhlonishwa, Sekela Mengameli Paul Mashatile Balingani

Basekhabhinethi

Emalunga Emakomiti Lamakhulu Etetimali Malunga

Lahloniphekile

Mengameli Welibhangi Lelikhulu LaseNingizimu

Afrika Khomishana weLuphiko Lwemalingena

LaseNingizimu Afrika Bantfu Bakitsi

baseNingizimu Afrika

## **SINGENISO**

Somlomo, ngekusho kwabosomnotfo lababili labaphakemee, Alberto Alesina kanye na-Dani Rodrik, “Umehluko loluhlata phakatsi kwetemnotfo nepolitiki kungaba kutsi umnotfo ubukene nekwandzisa umnotfo bese kutsi ipolitiki imayelana nekuwusabalalisa”.

Liphuzu, Somlomo, kutsi bukhulu kanye nekhwalithi yephayi yavelonkhe ngiko lokwatisako, futsi ekugcineni kuncuma, kufezekiswa kwesiphoccelelo setfu setepolitiki sekusabalalisa kabusha.

Umgomo wetfu kuleminyaka lengu-30 ledlulile bekukubuyisela kokubili bulungiswa betenhlalakahle netemnotfo esiveni sakitsi, kanye nekubukana ngco nekungalingani lebekuluphawu lekubandlulula lokuhlelekile nekuphucwa umhlaba.

Imicombelelotimali lesiyetfule kusukela nga-1994, beyimayelana nekucinisekisa umgomo wekukhulisa umnotfo, kute sente lokutse gcagca kubukana nekungalingani kanye nekushoda lokusakhatsata umphakatsi wetfu futsi kubukela phasi sitsembiso sentsando yelinyenti.

Ngako-ke, kulilungelo nenjongo lenkhulu kutsi ngime phambi kwenu kwetfula lomcombelelotimali wekugcina wembuso wesitfupha wentsandvo yelinyenti.

Somlomo, ngako-ke ngetfula lemiculu lelandzelako phambi kwaleNdlu:

- Umthetfosivivinyo Wekuhlukaniswa Kwemalingena wanga-2024;
- Umtsetfosivivinyo Wekwabela wanga-2024;
- Tilinganiso Tetindleko Tavelonkhe;
- Kubuyeketwa Kwemcombelelotimali kwanga-2024;
- Luhlaka Lwetetimali lwanga-2024;
- Umtsetfosivivinyo Wekwabiwa Kwetichibiyelo Tesibili;
- Inkhulumo Yemcombelelotimali; kanye ne
- Mtsetfosivivinyo Wekulungiswa Kwe-akhawunti Yegolide Netimo Letiphutfumako Tekushintjisana Ngetimo Tangaphandle

## **SIMO SETEMNOTFO**

### ***Simo Sasemhlabeni***

Somlomo, ngivumele ngicale, ngezimo sasemhlabeni.

Kukhulu kwemnotfo kwasemhlabeni kulindzeleke kwekutsi kukhule, kusukela ngemapheseneti langu-3.1 kulomnyaka kuye ku 3.2 nga-2025.

Lokutfufuka lokukahle kungenca yekukhula e-United States kanye neminotfo leminingana lemikhulu lesafufusa.

Kunetingozi tekuya phasi letisukela ekukhuphukeni lokungenteka kwentsengo yawoyela emhlabeni wonkhe, uma kungcubutana e-Middle East kudlondlobala futsi uma kukhula kuncipha eShayina - zakwetfu lomkhulu lesihwebelana naye.

## **Simo Sasekhaya**

Nanobe simo semhlaba lesitfufukile sanga-2024, kukhula kweNingizimu Afrika lokusedvute kusaloku kuphatanyiswe ngemanani laphasi emphahla kanye nekucindzeteleka kwetakhiwo.

Silinganisela kukhula kwangemphelela kwe-GDP ngemaphesenti langu-0.6 nga-2023. Loku kwehle kusukela ku-0.8% wekukhula lokulinganiswe ngetikhatsi se-MTBPS yanga-2023.

Lokubuyeketwa kungenca yemiphumela lebutsakatsaka kunaleyo lebilindzelwe kukota yesitsatfu ya-2023, ikakhulukati kutsenga kwasemakhaya kwemiti kanye nokutjalwa kwetimali lokungagucuki.

Phakatsi kwa-2024 na-2026, kukhula kulindzeleke kutsi kube ngemaphesenti langu-1.6.

Simo sekukhula kwemnotfo sesekelwa kwehla lokulindzelekile kwekuncishiswa kwagezi njengobe emaphrojekthi lamasha agezi acala kukhucita, futsi njengobe kwehla kwemandla emali kusekela kutsenga kwasemakhaya kanye nekuniketwa kwetikweleti.

Kodwa, kuphindze kube netingoti esimeni semnotfo sasekhaya. Loku kufaka phakatsi kucindzeteleka lokuchubekako kwekuphakelwa kwagezi, loliwe wetimphahla netikhumulo temikhumbi; kanye nebungoti lobusetulu betikweleti.

Insayeya yetfu, malunga lahloniphekile, kutsi bukhulu bephayi abukhuli ngekushesha ngalokwanele kuhrangabetana netidzingo tetfu tentfufuko.

## **SIMO SETETIMALI NELISU**

Ngalokunjalo, lisu letfu letetimali lisekela kukhula kwemnotfo futsi linciphisa bungoti emnotfweni ngalesikhatsi licinisekisa kusimama kwetimali.

Uma kuchatsaniswa nemnyaka lodlulile, kusilela kwemcombelelotimali kwanga-2023/24 kulinganiselwa kutsi kutawuba kubi kusuka kumaphesenti langu-4 kuya kumaphesenti langu-4.9 e-GDP.

Kusilela kwemcombelelotimali lokusetulu kusho kutsi tindleko tekukhokhela tikweleti nga-2023/24 tibuyeketwe taba etulu, nga-R15.7 bhiliyoni kuya ku-R356 biliyoni.

Tindleko tekukhokhela tikweleti titawutsatsa ngetulu kwemaphesenti langu-20 emalingena. Kubeka loku ngendlela lefanele, kusetjentiswa kwemali etindlekweni tekukhokhela sikweleti kukhulu kunemicombelelotimali yekuvikela umphakatsi, yetemphilo, nobe yekuthula nekuvikeleka.

Ngalesisizatfu, Malunga Lahloniphekile, sicinisa lisu letfu futsi sibambelele etinhlosweni tetfu tetimali.

Kwehliswa kwenethi ya-R80.6 bhiliyoni etindlekweni lekungetona intalo kusetjentiswa esikhatsini lesimaphakatsi. Ngaleso sikhatsi, imalingena ibuyeketwe yakhuphuka nga R45.6 bhiliyoni esikhatsini lesimaphakatsi, uma kuchatsaniswa ne-2023 MTBPS. Futsi, sitsatse sincumo sekwetfula kuguculwa kwe-Akhawunti Yekulondvolota Yesimo Lesiphutfumako Segolide Nekuntjintjiselana Kwangaphandle, leyatiwa ngekutsi yi-GFECRA.

Uma sekuhlangene, ngisho nekwenyuka kwetindleko lengitawutimemetela ngekuhamba kwesikhatsi, samba semalimboleko sahumende wavelonkhe sitawehla, kusuka ku R457.7 bhiliyoni nga-2024/25 siye ku R428.5 bhiliyoni nga-2026/27. Kusilela kutawucala kuba ncono kusukela nga-2024/25, kuye esilinganisweni semaphesenti langu-4.5 e-GDP, sifike kumaphesenti langu-3.3 nga-2026/27.

Sikweleti manje sitawufinyelela kumaphesenti langu-75.3 e-GDP nga-2025/26.

Konkhe loku kusibeka etfubeni lekuchubeka nekuvikela tinsita letibalulekile. Kuvumela emaphesenti langu-60 ekusetjentiswa kwemali lokungeyona intalo kutsi acondziswe emholweni wemphakatsi. Futsi kusivumela kutsi silondvolote kusetjentiswa kwemali lenkhulu.

Uma kuchatsaniswa ne-MTBPS, sengeta R57.6 bhiliyoni yekukhokhela imiholo yabothisela, bonesi nabodokotela, phakatsi kwaletinye tinsita letibucayi.

Somlomo, njengobe ngishilo ekucaleni, kulomcombelelotimali simemetela tingucuko te-GFECRA. I-GFECRA yi-akhawunti lephetfwe kuLibhangi Lelikhulu lebhalisa tinzuzo nekulahlekelwa ekuhwebeni kwemali yangaphandle yelive.

Kalula nje: uma Lirandi licina uma lichatsaniswa neLidola laseMelika naletinye timali letibekiwe, ibhalansi ye-akhawunti iyehla, njalo njalo. Ibhalansi ye-akhawunti ikhule yaba ngetulu kwa R500 bhiliyoni eminyakeni ledlulile ngenca yekutsi Lirandi liye lehla ngekuhamba kwesikhatsi.

Luhlelo lulosha lwekukhokhela tikweleti luyangeniswa lolu lolutawunciphisa kuboleka kwahulumende futsi lutfutukise simo seLibhangi Lelikhulu.

Ekugcineni, sisondzeta iNingizimu Afrika edvute nabontsanga betfu futsi sicinisekisa kuhambisana nekwenta lokuhle kwemave ngemave. Sitawukhipha R150 bhiliyoni webhalansi ye-GFECRA uma ngabe sesitfole siciniseko sekutsi imali leyanele iyatfolakala kute imunce kushintja kwelizinga lekushintjisana kanye nekukhokhelwa kweLibangi Lelikhulu akuphatamiseki.

## **KWESEKELA KUKHULA KWEMNOTFO**

Sicale luhlelo lolubanti lwetingucuko tesakhiwo lokuhloswe ngalo kubukana netinsayeya letibambelele kukhula kwetfu.

Luluhlelo lubandzakanya tindzawo letifana nagezi, tekutfutsa, emanti, tekuchumana kanye netingucuko te-visa. Kubuyeketwa Kwemcombelelotimali kuchaza inchubekelaphambili lenhle leseyentiwe kuletindzawo eminyakeni lembalwa ledlulile.

Kodvwa, tivimba tisasekhona futsi ngivumele ngigcile kuleti letimbili letinkhulu kunato tonkhe.

## **Igezi**

Kucishwa kwagezi yinkinga lebukene nabo bonkhe bantfu baseNingizimu Afrika. Kutsikameta kukhucita, imisebenti kanye netimphilo tebantfu.

Kuguculwa kwalomkhakha kutawuholela ekucinisekisweni kwagezi kwesikhatsi lesidze.



Sitsatse tincumo letifanele eminyakeni lesihlanu ledlulile futsi leti tiletsa titselo.

Kukhutsata kutjalwa kwetimali lokwengetiwe kugezi lovuselelekako, lomcombelelotimali uphakamisa kwenyuswa kwemkhawulo wemaphrojekthi agezi lavuselelekako langafanelekela luhlelo lwekususwa kwekhabhoni, kusuka kumamegawathi langu-15 kuye kumamegawathi langu-30.

I-Eskom isachubeka nekubamba lichaza lelibalulekile emkhakheni wagezi. Futsi luhlelo lwekusita tikweleti luvumela inkampani kutsi igcile ebhizinisini layo lelingumgogodla.

Sitawukhipha umbiko wekubuyeketwa lokutimele kwetiteshi tagezi letiphehlwa ngemalahle taka-Eskom ngeliviki lelitako. Lokubuyeketwa kwentelwa kwatasa incenye yemibandzela lehambisana neluhlelo lwekusita tikweleti.

Tincomo titawungena etinhlelweni tenkampani yaka-Eskom tekucinisa kutiphendvulela kanye nekwengamela.

Kungenca yenhlanganisela yekutjalwa kwetimali kwangasese kumaphrojekthi lamasha agezi, kufakwa kwe-solar eluphahleni kanye nekutfufukiswa kwetiteshi letiphehla igezi taka-Eskom lapho kutawuncipha khona kucishwa kwagezi, kanye nekwetsembeka nekuphepha kwekuphakelwa kutawubancono.

Kwengeta, kute sisekele lemitamo, setfula luchaso lolunemibandzela lolusha lwa R2 bhiliyoni esikhatsini lesimaphakatsi kute kuchaswe kukhishwa kwema-smart prepaid metre.

Loku kutawucala ngabomasipala labagunyatwe kutsi bakhokhe tikweleti.

## **Tekutfutsa**

Kute kubukwane neluhlelo lwaseNingizimu Afrika lwetekutfutsa lolukhula ngekungatsembeki, Ikhabinethi ligunyate Luhlelo Lokutfufwa Kwemphahla Ingongoni 2023.

Umdvwebo wemgwaco uveta tinyatselo letisheshako letidzingekako kute kutfutukiswe imishini yasesikhumulweni semikhumbi, kutfolakala kwetitimela nekuphepha kwenethiwekhi.

Iphindze ibeke indlela lecacile yekutfutukisa kusebenta kahle, kwenta lula kwetfulwa kwekuncintisana kanye nekusebentisa kwesekelwa kwetimali netebuchwepheshe kwemboni letimele.

Mayelana naloku, kufinyelela kwemuntfu wesitsatfu kunethiwekhi yetitimela letitfwala imphahla kutawungeniswa ngaMeyi 2024.

Etikhumulweni temikhumbi, umhlanganyeli wangasese utfoliwe wekutfutukisa i-Pier 2 yase-Durban Container Terminal. Loku kufanele kukhulise kutjalwa kwetimali kwangasese kumishini, kutfutukise emandla etebuchwepheshe futsi kutfutukise kusebenta kahle.

Hulumende unikete iTransnet sicinisekiso semabhiliyoni langu-R47 kute isekele luhlelo lokubuyisela lenhlangano futsi ihlangabetane netibopho tayo letisheshako tetikweleti.

Njenge-Eskom, sicinisekiso sihambisana nemibandzela. Letimo tidzinga kutsi iTransnet igcile emisebentini yayo lengumnyombo, kanye nekutsi inkampani yetfule budlelwano betinkampani letimele. Loku kutawentancono kusimama kweTransnet futsi kusekele kucaliswa kwe-*roadmap*.

### **Kwesekela Kusisa Kusakhiwocanti Semphakatsi**

Somlomo, ngiyatichenya kumemetela kutsi njengencenye yalomcombelelotimali, setfula tingucuko letibalulekile futsi letifinyelela kudze ekuchaseni ngetimali nangekuphakelweni kwesakhiwocanti.

Letingucuko tekutsi kukhuliswe luchungechunge lwelinani lesakhiwocanti kute lusebente ngemphumelelo futsi luphumelele.

Ngalendlela, sitocinisa kuphatfwa kwekutjalwa kwetimali kwemphakatsi kanye neluchungechunge lelinani lelihambisana nalo. Sitawuphindze sihehe kubamba lichaza kwemboni letimele.

Macondzana:

- Sifake kugazethi tichibiyelo teluhlaka lwekulawula lwe-PPP kute umphakatsi uphawule ngalo ekucaleni kwaleliviki. Tichibiyelo tifuna kunciphisa inkimbinkimbi yenchubo yekwenta ema-PPP, kwakha likhono lekusekela nekuphatsa ema-PPP, kwenta imitsetfo lecacile yekuphatsa emabhidi langakacelwa, kanye nekucinisa kuphatfwa kwengoti yetimali.
- Sibuyeketa tinhlelo tesikhungo kanye nekungamela kwesakhiwocanti lesikhutsatako. Inhloso kutsi kwakhiwe tindlela leticacile tekutiphendvulela, kubambisana kanye nekuchumana.
- Futsi sihlanganisa imisebenti lefanako kute sinciphise kuphindzaphindza nekungasebenti kahle. Inhloso kuphangisisa kuphakelwa kwetidzingo, kakhulukati tinhlelo tetimali letihlanganisiwe.
- Setfula emathuluzi etetimali lamasha lamanyentana, njengamabhondi esakhiwocanti kanye nemalimboleko yemvume. Njengencenye yaloku, kucatjangwa tinsita tentsela emaphrojekthi latsite esakhiwocanti, lafana nemathrasti kanye naletinye tinsita tekutjala.
- Sikhatsi sekwesekela ngetimali lesisha kwetiphakamiso ngaphasi kweluhlelo lolusha lwetinsita tetimali sitawuvulelwa tikhungo tahulumende madvute.

Ngaletingucuko, tinzuzo letikhulu kanye nekuletfwa kwetakhiwocanti kutawuphangisiswa.

Loku kutawuzuzisa imikhakha yenethiwekhi, sakhiwonchanti semphakatsi, ema-PPP kanye nemaprojekthi etetimali lahlanganisiwe.

### **Kucondziswa Kwetetimali Tesimo Selitulu**

Somlomo, Litiko Letetimali Lavelonkhe lidlala indzima lebalulekile ekuhlanganiseni tinsita, kuklama tintfo letikhutsatako, kanye nekuba nemtselela wenchubomgomo kute kuhambisane nekugucugucuka kwesimo selitulu.

Njengobe tinhlekelele letihambisana nesimo selitulu tiya ngekukhula, kwakhiwa indlela lenetigaba letinyenti letesekelwe etingozini kute kulawulwe bungoti betimali lobuhambisanako.

Loku kubuka emathuluzi lahlukene ekuchasa ngetimali kusukela kutibonelelo kuya etikhwameni tetimo letiphutfumako, lokuhlanganisa neSikhwama Semphendvulo Ngekuntjintja Kwesimo Selitulu, kuye ngesehlakalo kanye nebukhulu besehlakalo.

Litiko Letetimali Lavelonkhe libuyeketa tibonelelo tekubukana netinhlekelele kute litfutukise kusebenta kahle nekudala tikhutsato tekuhlela, kulungela kanye nekunciphisa tinhlekelele.\_

Liphindze litfutukise luhlaka lwekumaka lwemcombelelotimali wesimo selitulu kute lube nemtselela etincumweni tenchubomgomo, kuhlela, netincumo temcombelelotimali, ngekulandzelela tindleko letihlobene nesimo selitulu kumicombelelotimeli yemphakatsi.

Kwesekelwa kwebaniketi betimali labanemvume lenemvume, njengemaBhange Ekutfutukisa Emave Ngemave, kuhamba libanga lelidze ekusekeleni imitamo yetfu yekugucugucuka kwesimo selitulu, kunciphisa, kuntjintjela kulomunye umbani, kanye nekusimama.

Kufakwa kwetinkampani tangasese kuyadzingeka ekulawuleni timali tetinhlekelele tesimo selitulu.

Hulumende ugogce US\$3.3 bhilyoni kute kube kumanje ku-Multilateral Development Banks kanye ne-International Finance Institutions yekwesekela kugucuka kwesimo selitulu, umbani, kanye netinjongo tekuntjintjela kulomunye umbani letinebulungiswa.

Sibamba lichaza lelikhulu etingcogweni tesimo selitulu, sihambisana nekukhutsata kwahulumende kwekugucula tikhungo tetimali temave ngemave.

Siphindze futsi sisebente nabomasipala labasiphohlango kute setayeke futsi sinciphise imitsetela yesimo selitulu kanye netehlakalo letiphatselene nesimo selitulu, ngekuniketa ngelusito lwetebuchwepheshe kumaprojekthi lamakhulu labukana nesimo selitulu.

### **Kwesekela Kukhicitwa Kwetimoti Lesinsha Tagezi**

Siphakamisomtsetfo Setimoti Tagezi siveta lisu letfu lekugucukela ekukhiciteni nasekusetjentisweni kwetimoti letinsha tembani lowahlukahlukene eNingizimu Afrika, kucala ngetimoti tagezi.

Ihlose kugucula imboni yetimoti isuke ekukhiciteni timoti tenjini levutsako yangaphakatsi iye endzaweni lekabili lehlanganisa timott tagezi, nga-2035.

Kute kugcugcutelwe kukhicitwa kwetimott tagezi eNingizimu Afrika, hulumende utawetfula sibonelelo sekutjala timali letinsha, kusukela ngamhlaka 1 Indlovulenkulu 2026.

Loku kutawuvumela bakhiciti kutsi bafune emaphesenti langu-150 emali lefanelekile yekutjala timali etimotweni letisebenta ngegezi nehayidrojini ngemnyaka wekucala.

Lesikhutsati sitawusetjentiswa ngetulu kweluchaso lolukhona ngaphasi kweLuhlelo Lekutfufukisa Kukhicitwa Kwetimoti.

Hulumende uphindze wabeka phambili tigidzi letingu R964 esikhatsini lesimaphakatsi kute asekele kuntjintjela etimotweni letisebenta ngegezi.

## **Kusebentisa Kutsengwa Kwemphahla Yetingucuko**

Malunga Lahloniphekile, uMtsetfosivivinyo Wekutfolwa Kwemphahla Kwahulumende waphasiswa ngekushesha Sigungu Savelonkhe. Umtsetfosivivinyo lochitjiyelwe manje udluliselwe kuMkhandlu Wavelonkhe Wetifundza kute uhambisane.

UMgcinimafa Wavelonkhe wesekela tishayamtsetfo tetifundza njengobe ticubungula uMtsetfosivivinyo futsi tichuba kulalelwa kwetimvo temphakatsi eveni lonkhe.

LoMtsetfosivivinyo uniketa tinyatselo tengucuko ngekubeka eceleni, kuhlolelwa ticu kanye nekutfufukiswa kwebantfu labebancishwe ematfuba ngenca yelubandlululo lolungenabulungiswa.

Letinyatselo titawusebenta emikhakheni letsite yebantfu lokuhlanganisa emabhizinisi lamancane laphetfwe ngebantfu labamnyama, bantfu labasikati labamnyama, bantfu labasha labamnyama, bantfu labamnyama labakhubatekile, kanye nemabhizinisi lasenzaweni letsite lokufaka ekhatsi nekuphocenelela ingucuko ngelizinga le-BBBEE.

LoMtsetfosivivinyo uphindze unikete kutfufukiswa kwetimboni tasekhaya ngekuco kwa kanye netinyatselo tekutfufukiswa lokusimeme, kucashwa kwebasebenti kanye nekutfufukiswa kwemabhizinisi, phakatsi kwalokunye.

Sati kahle kutsi njengamanje, tinchubo tekutsengwa kwemphahla ngalokuvamile tiyasilela ekuletseni ticazululo letingabiti kakhulu etidzingweni tahulumende.

Etikhatsini letinyenti, kunemehluko lomkhulu phakatsi kwemanani lakhokhiswa hulumende kanye nemanani emakethe lakhona.

Sibonelo, hulumende utsenga i-hardware ye-ICT letifana nemakhompyutha laphatsekako, tisetjentiswa tagezi letingaphatamiseki, emamonitha, nemathoni, ngekuphindzana phakatsi kwa-1.2 naka-2 kundlula intsengo yasemakethe.

Ngekuya ngekutsi hulumende utsenga ngemanani lamakhulu, kufanele ngabe sikhokha kancane futsi sisebentisa emandla etfu ekutsenga kute sizuze kakhulu ngelinani lemali yetfu.

Kutfola linani lemali, kanye nemigomo yekusebenta kahle, kungabi nemfihlo, nekuncintisana, kuhlala kubalulekile. Futsi sifuna kucinisekisa bantfu baseNingizimu Afrika kutsi lemigomo ayihambisani nengucuko.

### **IMIKHUBA YEMALINGENA KANYE NETIPHAKAMISO TENTSELA**

Malunga Lahloniphekile, kusebenta butsaka kwemnotfo wetfu kubangele kwehla lokukhulu ekugcogcweni kwemali yentsela nga-2023/24.

Nga-R1.73, thriliyoni imalingena yentsela nga-2023/24 ingaphasi nga-R56.1 bhiliyoni kunaleyo beyilinganiselwe kuMcombelelotimali wanga-2023.

Kushoda kakhulu kungenca yekwehla kwenzuzo yetinkampani kanye nenzuzo levela etintseleni tetimayini.

Esikhatsini lesimaphakatsi, tilinganiso temalingena tingetulu kwa-R45.6 bhiliyoni ngetulu kwetilinganiso te-MTBPS yanga-2023 letikhuphule intsela yemalingena lecondzene nemuntfu kanye netiphakamiso letengetiwe temalingena yesikhatsi lesimaphakatsi.

Lomcombelelotimali ucuketse tinyatselo tentsela letitawugcogca R15 bhiliyoni nga-2024/25 kute kuncishiswe kucinzeteleka kwetimali ngekushesha kanye nekwesekela kusimama kwetikweleti ngekushesha.

Imalingena igcogcwa kakhulu ngentsela yemiholo yebantfu ngekungalungisi bokaki bentsela, tephulelo kanye nekhredithi yentsela yetekwelapha yekwehla kwemandla emali.

Mayelana nentsela yemtselo wemikhicito yetjwala, kuhlongotwa kwenyuka kwekwehla kwemandla emali lokungetulu kwemaphesenti langu-6.7 kuya ku-7.2 nga-2024/25. Loku kusho kutsi:

- Likani lebhya likhuphuka ngemasebenti langu-14;
- Likani le-cider netinatfo tetitselo letinetjwala kukhuphuka ngemasenti langu-14;
- Libhodlela lewayini litawubita emasenti langu-28;
- Libhodlela lewayini lecinile litawubita emasenti langu-47 langetiwe;
- Libhodlela lewayini lecwebetelako litawubita emasenti langu-89; futsi
- Libhodlela letipiriti, lokuhlanganisa i-whisky, i-gin nobe i-vodka, likhuphuka nga-R5.53.

Siphakamisa futsi kukhuphula intsela yemtselo weligwayi ngemaphesenti langu-4.7 kumasikilidi nasegwayini, futsi emaphesenti langu-8.2 kuligwayi leliphayiphi nemasigali (cigars). Loku kusho:

- Kukhula kwa R9.51 kwemasigali;
- Kukhula kwa 97 wemasenti kuliphakethi lemasikilidi; kanye
- Nemasenti langu-57 langetiwe kuliphayiphi leligwayi.

Kamogelo Mogane waseSoweto, ungulomunye webantfu baseNingizimu Afrika labangetulu kwetinkhulungwane letimbili nesikhombisa labatfumele ema-Tips Emcombelelotimali kuNdvuna, unesiphakamiso lengingatsandza kwabelana ngaso.

Kamo utsi: “Ngitsandza kuphakamisa kwenkhokhelo yentsela ye-hubbly bubbly, e-cigarettes naletinye tindlela tekubhema. Live libone kukhula kwesibalo selusha lolubhema lemikhicito futsi batali abajabuli kwasahlobo ngaloku.”

Kamo, njengemtali ngekwami, ngivumelana nawe. Futsi ngicinisekile kwekutsi Indvuna Yetemphilo nayo iyavuma.

Utawujabula kuva-ke, kutsi setfula kwenyuswa kwentsela yemphahla ye-nicotine ye-elektronikhi kanye naletinye tindlela tekubhema ligwayi lelingena-nicotine, letatiwa ngema-vape, ibe ngu-R3.04 ngemilitha ngayinye.

Etintselweni temvelo, intsela yekhabhoni ikhuphuke kusuka ku-R159 yaya ku-R190 lithani ngalinye kulokulingana ne-carbon dioxide kusukela ngamhlaka 1 Bhimbidvwane 2024.



Umtseo wemafutsa ekhabhoni utawukhuphuka ufinyelele kumasenti langu-11 ilitha kuphethiloli kanye nemasenti langu-14 kudizili kusukela ngamhlaka 3 kuMabasa 2024.

Liphepha letingcogco lelichaza tiphakamiso tesigaba sesibili sentsela yekhabhoni litawushicilelwa kute umphakatsi uphawule ngalo ngasekupheleni kwemnyaka.

Somlomo, siyatibona letindleko tekuphila letivele setisetulu kanye nemtselela emanani aphehiloli lanawo etindlekweni tekudla netekutfutsa.

Macondzana naloku, siphakamisa kutsi kungabi khona kwenyuswa kwentsela yaphethiloli jikelele nga-2024/25. Loku kutawuholela ekukhululweni kwentsela lelinganiselwa ku-R4 bhiliyoni. Lena yimali lebuyela emaphakethini ebatsengi.

Somlomo, inchubekelaphambili seyentiwe mayelana neluhlelo lekutsatsa umhlalaphansi lolunetimbata letimbili kusukela ngagcina kukhuluma nawe ngezikhatsi se-MTBPS.

Iminikelo yesikhwama semhlalaphansi itawuhlukaniswa, incenye yinye kuletintsatfu iye “encenyeni yekonga” bese tincenye letimbili kuletintsatfu tingene “encenyeni yemhlalaphansi”.

Kusukela ngamhlaka 1 Inyoni 2024, kukhishwa kwemali kwekucala kungentiwa ebhodweni lekonga.

Luhlelo lolunemabhodo lamabili lucinisekisa kutsi sifinyelela kulingana phakatsi kwekulondvolota iminikelo kute kuvikelwe umhlalaphansi loncono wemalungu, ngalesikhatsi kubukwana nelusizi lwebantfu lwekutfola letinye tetikhwama tabo temhlalaphansi kute basite kudzambisa imitfwalo yabo yetetimali ngetikhatsi letimatima.

Kuleminyaka lembalwa letako, futsi sisebentisa intsela lencane yemhlaba wonkhe yebhizinisi kute sinciphise imiphumela lemibi yekuncintisana kwentsela.

Tinkampani temave ngemave letinemalingema yemnyaka lengetulu kwa €750 wetigidzi titatiwukhokhiswa linani lentsela lemaphesebenti langu-15, kungakhatsaleki kutsi inzuzo yato ikhicitwa kuphi.

Lolushintjo loluhlongotwako kulindzeleke kutsi luletse lenye imalingena lengu R8 bhiliyoni kumalingena yentsela yetinkapani nga-2026/27.

Ngikhutsata emacembu lanenshisekelo kutsi anikete imibono mayelana nemtsetfosivivinyo we-Global Minimum Tax Bill loshicilelwe namuhla.

Lisu letfu lenchubomgomo yentsela yesikhatsi lesidze lisaloku ligcile ekwandziseni sisekelo sentsele ngalesikhatsi litfutukisa kutfojtelwa kwentsela nekusebenta kahle kwekuphatsa.

Inchubekelaphambili lebonakalako yentiwe ekwaxhiweni kabusha nasekwenteni i-SARS ibe yesimanjemanje.

Siphatsimandla sentsele sandzise irejista yentsela, satfutukisa kugcogcwa kwetikweleti futsi sanciphisa kubuyiselwa kwemali lokungumgunyati kanye netilinganiso tekuhweba. Loku kuholele ekutfutukisweni kwekugcogcwa kwemalingena.

Kute kubukwane nemazinga lasetulu eligwayi lelingekho emtsetfweni, i-SARS isebentisa i-CCTV kanye nebuchwepheshe lobuhlobene kubakhciti beligwayi labanelayisensi. Luphenyo kanye nekushushiswa sekuholele ekutseni kube nesamba sa R10 bhiliyoni ekuhlolweni lokwengetiwe lokuvela kubahlanganyeli lababalulekile embonini yegolide neligwayi lengekho emtsetfweni, lokuyimali lengetulu kwa R4 bhiliyoni levela kubahlanganyeli lababalulekile embonini lengekho emtsetfweni yegolide neyeligwayi.

Lemitamo kanye naleminyane isite ekwenteni ncono imalingena.

Insayeya yetfu lenkhulu, njengobe ngike ngasho ekucaleni, kutsi iphayi yetfu ayikhuli ngekushesha ngalokwenele futsi loku kunciphisa emandla etfu ekutfole imali leyanele kute sisabalalise etindzaweni tetfu letibalulekile.

## **TINHLELO TEKUSEBENTISA IMALI**

Somlomo, ngezikhatsi se-MTBPS yanga-2023 lapho khona kugcogcwa kwemalingena kube kubi kakhulu kunaloko bekulindzelwe, kwadzingeka kutsi ematiko ibeke phambili kusetjentiswa kwemali futsi emukele kwenyuswa kwemaholo ngekwesisekelo sayo.

Letinyatselo tatsatfwa kute kuvikelwe bucofto betfu kwetimali. Ngalokulinganako, tinhlelo letibucayi bekufanele tivikelwe. Loku kukubonakaliswa lokwentekako kwekuciniswa kwetimali lokusekela kuletfwa kwetinsita letingumnyombo kanye nemaholo emphakatsi.

Kusukela lapho, sikwatile kuhlehlisa lokunye kuhlanganiswa kwetimali lokwamenyetelwa ngezikhatsi se-MTBPS.

KuloMcombelelotimali, ngiyakwati kumemetela kutsi umkhakha wetemfundvo wabelwa R25.7 bhiliyoni kute kuchutjekwe netindleko tekukhushulwa kwemaholo esikhatsini lesimaphakatsi.

Ngaso lesikhatsi, sikwatile kuvikela imicombelelotimali yetinhlelo letibalulekile njengeluhlelo lwekudla etikoleni. Loluhlelo luniketa ngekudla kubafundzi etikoleni leticishe tifike ku-20,000.

Imali yesibonelelo sahumende yebantwana labasakhula yabelwa R1.6 bhiliyoni ikhuphukele ku-R2 bhiliyoni esikhatsini lesimaphakatsi.

Temphilo tabelwa samba lesingu R848 bhiliyoni ngezikhatsi se-MTEF. Letabelo tifaka ekhatsi R11.6 bhiliyoni wekubukana nesivumelwano semaholo sanga-2023, R27.3 bhiliyoni wesakhiwoncanti, kantsi R1.4 bhiliyoni wesibonelelo se-NHI ngetikhatsi lesifanako.

Sabelo se-NHI siyinkomba yekutibophetela kwahulumende kulomgomo. Kusele luchungechunge lwemisebenti yekucinisa luhlelo, lesisekelo lebalulekile yeluhlelo lwekunakekelwa kwetemphilo lolutfufukisiwe, lekumele lwentiwe.

Imisebenti lenjalo ifaka ekhatsi:

- Kwakha luhlelo lwavelonkhe lwemningwane wetemphilo kanye nemarekhodi etigulani ladijithali;
- Kutfufukisa tikhungo tetemphilo kanye nekwenta ncono lizinga lekunakekelwa kute kucinisekise kutsi tiyahlangabetana netidzingo letiphasi kute ticinisekise futsi tigunyatwe kutfolo tinkontileka ngaphansi kwe-NHI;
- Kucinisa tikhungo kanye nekuphatfwa kwemadistikthi kulungiselela kwenta tinkontileka;

- Kuniketa simo sekutimela ngalokungakagcwali kwetibhedlela letimaphakatsi (kanye nalokungenteka lokunye); futsi
- Kutfutukisa tintsengo tekundluliselwa netindlela tekukhokha tebaniketi betibhedlela.

Leminyenti yalemisebenti seyivele iyachubeka kodvwa idzinga kutfutukiswa lokwengetiwe ngaphambi kwekutsi i-NHI yetfulwe ngezikali.

Somlomo, kube nenchubekelaphambili lebonakalako ekwenteni ncono kufinyeleleka kutinsita tekutfutsa temphakatsi kubagibeli labahola kancane.

Luhlelo lwekubuyiselwa kwetitimela lwe-Ejensi Yetitimela Tebagibeli eNingizimu Afrika luyaqhubeka, njengobe emakhorido langu-27 avulwe kabusha ngeNgongoni 2023. Loku kutawenyusa sibalo seabagibeli kuMetrorail kusuka kutigidzi letingu-15.6 nga-2022/23 siye etigidzini letilinganiselwa ku-48.6 nga-2026/27.

Kucinisekisa kwentiwa ngemphumelelo kwemisebenti yayo ngezikhatsi sselukhetfo, kanye naleminye imisebenti yayo ngemuvae kwelukhetfo, Ikhomishana Yelukhetfo Letimele yabelwe R2.3 bhilioni ngetulu. Emaphoyisa kanye nabetekuvikela baphindze babelwa lenye imali letigidzi letingu R350 kwesekela lukhetfo. Letinye tigidzi letingu R200 titaniketwa kuchasa emacembu etepolitiki njengobe emacembu etepolitiki alungiselela lukhetfo lwavelonkhe.

Hulumende uphindze asekele balimi labahlaliswe kabusha ngeluhlelo lwekwabiwa kabusha kwemhlaba kanye netinhlelo tekushintjwa kwetindzawo tekuhlala, letiniketwe R6 bhilioni kuMTEF.

Kuhambisana nekwehla kwemandla emali kanye nekwandisa kufinyelela, tibonelelo tahulumende tanomphela tiyakhuphuka.

- Kukhula nga-R100 kutibonelelo talabadzala, tabomakadzebona betimphi, tibonelelo tekukhubateka kanye netekunakekela. Lelinani litawuhlukaniswa libe ngu R90 kusukela ngaMabasa, bese kutsi R10 kusukela ngeMpala;
- Kukhulwa kwa R50 kusibonelelo semntfwana longetiye wakho; futsi
- Kukhula kwa R20 wesibonelelo sesondlo seabantfwana.

Siyavelana nekukhula kwetindleko tekuphila kubantfu baseNingizimu Afrika labafika

kutigidzi letingu-19 labatsebele kuletibonelelo kutsi batiphilise.

Mayelana naloku, sente lokunyentinjengobe imvilophu yetimali isivumela.

Kwamanje uyachubeka umsebenti wekutfutukisa Sibonelelo Sahulumende Sekusita Ekuhluphekeni kwe-COVID-19 ngaMabasa kulomnyaka. Litiko Letetimali Lavelonkhe litawusebentisana neLitiko Letekutfutukiswa Kwetenhlahlakahle ekucinisekiseni kutsi kutfutukiswa kwalesibonelelo kufakwe kumitsetfotimiso yekugcina.

Lokutfutukiswa kutawuba ngaphakatsi kweluhlaka lwetimali lwamanje. Kute kwandziswe sibonelelo sahumende ngemva kweNdlovana 2025, kutawuphotfulwa tingucuko tenchubomgomo yetekucinisekisa kwetenhlahlakahle, kanye nemtfoombo wetimali.

Siphindze senta kuphakelwa ngetinhlelo letibalulekile lokuhloswe ngato kudala tmatfuba emisebenti.

R61.4 bhiliyoni ubekelwe tihlelo tekucasha esikhatsini lesimaphakatsi. R7.4 bhiliyoni ubekelwe Luhlelo lwaMengameli Lwekucasha.

Hulumende uphindze wabeka phambili kulwa nebugebengu nenkhohlakalo agcile ekutfutukiseni ema-ajensi lacinisekisa kutfojelwa kwemtsetfo. Samba lesingu R765 bhiliyoni sibekelwe licembu lekuthula nekukhuseleka.

Ngemnyaka wetimali lotako, kutawucecshwa emaphoyisa lamasha langu-10 000.

Njengencenye yesibopho selive sekutfutukisa kuthula kwesifundza kanye nekutinta, lesabelotimali sitawuphindze sabe timali tekutfunyelwa kwemasotja e-Mozambique nase-DRC.

Umsebenzi wetindleko kanye nekubona tidzingo talemisebenti lebalulekile utawuchubeka umnyaka wonkhe futsi imali itawukwabiwa kanjalo.

Tigidi letingu R628 tabelwe Litiko Letebulungiswa Nekutfutukiswa Kwemtsetfosisekelo kute kucaliswe tincomo te-FATF kanye neKhomishana Yekubanjwa Kwembuso Ngabhongwane lekuletse imali seyiyonkhe kulemitamo ibe ngu-2.3. bhiliyoni.

Hulumende usebentisa R2.9 bhilioni ku-Akhawunti Yekubuyiswa Kwemphahla Yebugebengu kute alwe nebugebengu betimbiwa lokungekho emtsetfweni kanye nalobunye bugebengu lobuphambili, emaphesenti langu-60 abekelwe kutfunyelwa kwemaphoyisa, kufaka ekhatsi nekutsengwa kwetimoti.

Lomcombelelotimali uphindze ubeke phambili kuphakelwa kwesakhiwoncanti. Hulumende uhlela kutjala imali lengetulu kwa R943 bhilioni kusakhiwoncanti semphakatsi.

Kusetjentiswa kwetimali kutawesekela kulungiswa nekugcinwa kahle kwemphahla lekhona kanye nekwakhiwa kwesakhiwoncanti lesisha.

### **KWEHLUKANISWA KWEMALINGENA**

Somlomo, R2.8 thrilioni, nobe emaphesenti langu-51.1, ato tonkhe tindleko letingetona intalo, aniketwa tifundza nabomasipala kuleminyaka lemitsatfu letako.

R531.7 bhilioni wabelwe bohulumende basemakhaya, R2.3 thrilioni uniketwe tifundza.

Lenye imali lengu R105.5 yabelwe tifundza eminyakeni lemitsatfu letako kute kuhangabetswane netindleko tekucaliswa kwesivumelwano semiholo yebasebenti bahulumende sanga-2023, ikakhulukati emikhakheni yetemfundo netemphilo.

Lokuniketwa kwaletimali letengetiwe kutawunciphisa kucinzeteleka kwetikweleti temiholo letibukene nalamatiko labucayi, ladzinga basebenti labanyenti, bese kukhululwa imitfombolusito yekutjala timali netimphahla kanye netinsita.

Ngetulu kwaloko, kwehliswa lobekwentiwa ngaphambilini kuletinye tibonelelo kuhocisiwe. Kubuyisela sisekelo saletibonelelo kutawusita kugcina tinsita letibalulekile kulabo labasengotini lenkhulu futsi kuniketele kutjalwa kwetimali lokubalulekile.

Nanobe kunjalo, kute kucinisekiswa kutsi timali tahulumende tihlala tisimeme, kwehliswa kuyentiwa kuletinye tisekelo letimbalwa, nanobe letinyenti tichubeka nekukhula eminyakeni lemitsatfu letako nangetulu nangatulu kwalokwehliswa.

Macondzana nabomasipala, R1.4 bhiliyoni leyengetiwe iniketelwa ngetibonelelo sabomasipala sekulungisa tinhlekelele kute kuchaswe kulungiswa nekwakhiwa kabusha kwesakhiwoncanti lesicekelwe phasi tikhukhula tanga-2023.

Somlomo, bomasipala bangumgogodla wekuletfwa kwetidzingo. Lokuvisa buhlungu, sibalo lesingamukelekile sabo sinebutsakatsaka ekubuseni, ekuphatfweni kwetimali, nasekuphakalweni kwetinsita.

Kubukana naletinsayeya, kanye nekugucula bomasipala babe tinjini tekukhula, sesemukele indlela lehlanganisa tintfo letinyenti.

Igcile ekuciniseni tinhlelo temcombelelotimali, kuhlanganisa kwengamela, kukhulisa emakhono kanye nelikhono lebasebenti bakamasipala, kanye nekuchuba kutjalwa kwetimali ekugcineni nasekwakhiweni sakhiwonchanti.

## **UMNYAKA LOTAKO**

Somlomo, kulomnyaka live letfu libambe imihlangano yeminyaka yonkhe ye-New Development Bank, lotawube kwenteka kwesibili kusukelwa kwasungulwa i-BRICS.

Nga-2025, iNingizimu Afrika itsatsa sikhundla sebumengameli be-G20, ilandzela iBrazil ne-India ngaphambi kwaloko.

Bumengameli baseNingizimu Afrika be-G20 litfuba letfu lekuchubekisela phambili tindzaba leticindzetela kakhulu tetemnotfo, tentfutfuko, kanye netetimali letibukene nemave lahluphekile nalasatfutfuka. Njengobe Mengameli Ramaphosa asho kahle Enkhulumeni yakhe Yesimo Sesive, umgomo wetfu “kubeka intfutfuko ye-Afrika ngetulu kwe-ajenda ngalesikhatsi sibamba i-G20 nga-2025”.

Silungiselela kwabiwa lokufanele kanye nekutfolwa kwetimali kute sicinisekise kutsi imicimbi leyahlukene iba yimphumelelo. Njengobe sikhombisile kamuva, iNingizimu Afrika saloku ingumholi lobalulekile wesigodzi nasemaveni emhlaba.

Ngekuhlanganyela kanye nekumela etinkhundleni letifana ne-G20, singaphusha ingucuko lenkhulu yetikhungo temave ngemave njenge-IMF kanye neLibhange Lemhlaba, kute emave lasatfutfuka akwati kuhlanganyela ngalokulinganako kutinchubo tekutsatsa tincumo kanye nekubusa kwemhlaba wonkhe.

Sibindi sekutiphatsa kanye nelwati akusiyo intfo leswelakalako eveni letfu. Kufanele sitisebenzise letipho, hhayi nje kutsi sititfutukise tsine nemnotfo wetfu, kodvwa kute kuzuze livekati lonkhe.

## **SIPHETFO**

Somlomo, lidze libanga lesilihambile kuleminyaka lengu-30 lendlulile. Iminyaka lengu-30 letako, nanobe ngutiphi tinsayeya nematfuba labangase bawaletse, kuyintfo lekufanele siyibuke ngalabomvu.

Uma sibuka sikhatsi setfu lesidlulile lesimetima, kanye naletinye tetinsayeya letingenakugwenywa lesike sabukana nato njengentsando yelinyenti lesakhula lesazama kutfole indzawo yayo emhlabeni logcwele incwaba yetinkinga letinsha naletihambisanako, kungaba lula kutitika ngekwecisa; kungaba kungatsembeki lokuyimphumphutse nobe kungabi nelitsemba lokukhubatako.

Kufanele simelane nako kokubili.

Kunaloko, kufanele silalele emavi aMengameli wetfu wekucala wentsandvo yelinyenti, Nelson Mandela, lowabona ngetulu kulabanyenti kutsi kuphishekela kubulungiswa benhlalo-mnotfo kanye nemphumelelo lekwabelwana ngayo kuluhambo hhayi indzawo lekuyiwa kuyo.

Ngivumele ngimcaphune ngalokubanti:

“Ngiwuhambile lomgwaco lomudze loya enkhululekweni. Ngizamile kungenti liphutsa; Ngente emaphutsa endleleni.

Kodvwa ngitfole imfihlo yekuthi ngemva kwekukhuphuka ligcuma lelikhulu, umuntfu utfole kutsi maningi lamanye emagcuma lekumele awakhuphuke.



Ngitsatsa sikhashana lapha kutsi ngiphumule, ngintjontje umbono we-vista lekhatimulako lengitungetile, ngibuke emuva kulelibanga lengilihambile.

Kodvwa ngingaphumula sikhashana nje, ngobe inkhululeko ita netibopho, futsi angilokotsi kubambeleleka, ngobe luhambo lwami ludze alukapheli.”

*Indze lendlela.*

Somlomo, njengobe sengiphetsa, ngifuna kukhumbuta bantfu baseNingizimu Afrika kutsi umyaleto lekufanele bawutsatse kuloMcombelelotimali ngulo: hulumende usebentisa kakhulu imitfombolusito lemincane kakhulu. Siyachubeka nge:

- Kusekela kukhula kwemnotfo;
- Kunciphisa kukhula kwesikweleti sahumende kanye netindleko tesikweleti; futsi
- Kwabela timali letengetiwe tetinsita letibalulekile, kuniketa imiholo yemphakatsi kanye nekulondvolota imicombelelotimali yesakhiwocanti.

Ngibonga Mengameli kanye neLisekela Lamengameli ngelusito nangebuholi babo lobuchubekako.

Ngibonga Lisekela Lendvuna Yetetimali, Dkt David Masondo, kanye nelicembu Lemgcinimafa Wavelonkhe leliholwa nguMcondisi-Jikelele, Dkt Duncan Pieterse.

Ngibonga Khomishana weLuphiko Lwemalingena lwaseNingizimu Afrika kanye neMbusi weLibhangi Lelikhulu laseNingizimu Afrika.

Ngibonga bozakwetfu eKomitini Letindvuna kuMcombelelotimali kanye naseMkhandlwini Wemcombelelotimali labahlanganyela umtfwalo lometima wetincumo letimatima lesititsatsako tekugcina timali tahulumende tisimeme.

KumaKomiti ePhalamende eTimali, Kwabiwa Kwetimali kanye nekuBuyeketwa Kwetimali Tahulumende, ngivakalisa kubonga kwami lokukhulu.

Kumkami kanye nemndeni, lutsandvo lwenu, kungesekela kanye nekubeketela

kulugcozi lwemalanga onkhe. Kwekugcina, ngibonga bonkhe bantfu baseNingizimu

Afrika.

Ngiyabonga.

# 2024 BUDGET

## Budget Speech

Private Bag X115, Pretoria, 0001 | 40 Church Square, Pretoria, 0002 | Tel: +27 12 315 5944 | Fax: +27 12 406 9055 | [www.treasury.gov.za](http://www.treasury.gov.za)



**national treasury**

Department:  
National Treasury  
REPUBLIC OF SOUTH AFRICA